

# Tura musicala en l'Europa guidada da Simon Camartin

Concert festiv digl Orchester sinfonic da giuvenils da L'viv

DA PAUL DUFF / ANR

■ **Il concerts da Simon Camartin cun orchestres sinfonics han lur plaz reservau ella davos'jamna digl onn. Persuenter procura il Forum cultural internaziunal cun l'organisaziun digl eveniment. Sin viadi da turmea han ils musicists dall'Ucraina fatg paus a Mustér la mesjamna vargada. Els ein vegni accompignai dils solists Duri Cathomen alla trumbetta e Mia Grubisic al violoncello.**

En ses concerts sa il dirigent *Simon Camartin* quintar cun visitaders da buna luna, pertgei ei va encunter la fin digl onn e la fiasta da Nadal ha sclariu cun energia positiva sils carstgauns. Il program musical se presenta perquei en vestgiu festiv e divertent. Il concert ei staus in mussament ch'era ils cumponists franzos san crear valzers e polonesas. Sin viadi encunter Vienna ei igl orchester sviaus viers la Spagna cun la cumposiziun «Habanera» da Chabrier, ha visitau Prag da Dvorak, fatg viseta en Finlanda tier Sibelius e semess sin viadi sin las rivas dalla Donau per arrivar a Vienna tier Johann e Josef Strauss. En quella capitala musicala astga la viseta tier Wolfgang Amadeus Mozart buca muncar ed in auter burghes e cumponist da Vienna, Carl Michael Ziehrer, ha medemamein fatg honur alla runda concertonta.

## Musica romantica da cumponists europeics

Ils romantichers franzos Charles Gounod, Camille Saint-Saens ed Emmanuel Cha-



Il dirigent Simon Camartin en plein'acziun e Duri Cathomen che ha sunau in'ovra da Mozart.

FOTO P. DUFF

brier han colurau expressiv il concert. Il valser ord l'opera «Faust» da Gounod sco avertura ha gest intunau cul traitact il concert. Pli tard ha in vent migeivel, emplenius cun l'odur dalla Mar mediterranea, purtau ils tuns dalla «Habanera» en sala, l'enconuscenta melodia da Chabrier. Sur

las undas ruasseivlas d'in lag ei allura il cign ballontschaus tut grazius (Saint-Saens, Carnaval des animaux). Grazia al bellezza tun dalla cellista *Mia Grubisic* ei il maletg digl animal seformaus en maiestusadad. Ellas ovras dad Antonin Dvorak, Giulio Caccini e David Popper ha la soli-

sta demonstrau sia virtuosidad e siu dun per igl instrument violoncello. In exclom d'admiraziun e smarvegl ballontschava mintgamai ella sala da concert cura ch'ella sepresentava sin tribuna. Mozart ha scret quater concerts per tgiern solistic ed orchester. *Duri Cathomen* ha purtau il

tierz concert, arranschaus da Nakariakov per tgiern da trumbetta (Flügelhorn). Siu sunar ha plaschiu al publicum aschi bein ch'el ha survegniu applaus gia suenter la part miez dil concert. Alla fin ha ei dau bravos e grond applaus per il musicist indigen. Il toc final «Fête polonaise» ord l'opera «La roi malgré lui» ha carmalau la virtuosidad cumpleina da mintga sunadur e sunadura digl orchester. Ils giuvenils musicists han demonstrau lur plascher da sunar e lur tecnica perfetga en quell'ovra preteusada dad Emmanuel Chabrier. Tuts registers digl ensemble ein occupai cun giuvnas e giuvenils musicists entusiasmai. Quei relata il tun digl entir ensemble che perschuada. Cun dinamica han els cudizau ils cunfins da pianissimo e fortissimo. Durent l'emprova avon concert ha il dirigent Camartin mulau ils davos detagls e caztgau als musicists il sentiment per buna musica. Quella muderigiada ei secumprovada el concert ed ils tuns e ritmus han constau a moda perfetga.

Il publicum, cumpariu en retschas serradas, ha estimau las produziuns cun applaus euforic e retschiert sco supplement il giavisch da biemaun, la polca «Sans soucis», pia, senza quitaus, da Johann Strauss il fegl. Alla fin resuna sco adina il salid da partenza, marsch avon, il «Radezkimarsch» da Josef Strauss. Nus schein a Simon Camartin in resentiun engraziel per l'ura divertenta ed a bien seveser culs amitgs e las amitgas musicists digl orchester da Lemberg ed ils solists.

## En stiva gronda decorada

L'Uniu da cant Vuorz ha dau concert

■ **(anr/abc) Denter ils firaus da Nadal e Daniel dat ei numerus concerts da tut gener. Festiv ein tuts, familiars denton buc. L'Uniu da cant Vuorz ei sepresentada margis sera ella baselgia dil vitg – en atmosfera familiara.** Per ordinari presentien els mintg'onn in concert primavaun. Damai ch'els separteschien il zercladur alla Fiasta da cant districtuala a Faleria hagien els encuret ina alternativa tier quella tradiziun. Aschia seigi il chor sedecidiu da porscher in concert d'unviern. Quei ha il president dil chor, *Heini Hunger*, getg en siu cuort plaid da beinvegni als visitaders dil concert. L'Uniu da cant Vuorz ei stada dil meini ch'il temps denter Nadal e Daniev seigi ideals per dar in concert, pertgei lu ein era biars hospis da vacanzas el vitg ed ella regiun. Tals ein lu era vegni stedi per tedlar il concert cul tetel «canzuns romontschas da Nadal e d'unviern».

### Auguris irlandes

La baselgia da Vuorz ei prest stada piena. Igl ei pilver buc ina dallas grondas baselgias dalla Surselva, persuenter ina dallas pli renomadas e bialas. Entrond en quella baselgia rest'ins adina puspei senza plaid. Co il Meister da Vuorz ha decorau avon prest 700 onns las preits fa impressiun. Ils maletgs fatgs entuorn ils 1330 dalla passiu, naven dalla sontga Tscheina tochen tier la crucifigaziun, ein pesonts e pensivs. Ad in concert da Nadal vesses ins bugen era in maletg dalla speranza. Lez maletg ha l'Uniu da cant Vuorz presentau. Naven dil mir santeri tochen all'entrada havevan commembras e commembers dil chor tschentau ina corda da candelas. Quella via illumina tochen el pierti ed alla porta baselgia ha vuliu preparar ils visitaders sin quei che spitgava.

In fegl accompignont cul program ha muncau aschia ch'ins ha astgau seschar sorprendere. Igl ei stau bien aschia, pertgei

negin ch'ei sefixaus sin cumposiziuns ni melodias. Ins ha astgau seschar tgamunar dalla musica dil chor e dalla solista *Cornelia Zeitberger*. La scolasta per flauta da pan alla Scola da musica Surselva ha sunau tocs tematics da Nadal e digl unviern. Denter auter ha ella presentau «White Christmas» e «Der Hirtenjunge mit 300 Schafen».

Ella baselgia da Vuorz eis ei stau durent il concert sco en ina gronda stiva. L'atmosfera familiara ha il chor creau cun canzuns sco «O stalla ventireivla», «Gl'unviern ei cheu», «Plaun, plaunet vegn la neiv», il coral «Tgei rosa splenduronta». L'instrumentalista ed il chor cun sia dirigenta *Ursula Kobler* ein sebrattai, duas canzuns ha la flautista accompignau. Sco canzun finala ha il chor cantau igl «Irish Blessing» ella versiun romontscha. Alla sava digl onn niev ha quei fatg senn ed impressiun. Ins ha capiu il text: «Plein sulegl seigien tes gis. Possien steilas tias vias sclarir. Biaras flurs sper tiu trutg flurir».



Da Daniev concertescha igl ensemble «Chamber Soloists Lucerne» el hotel The Chedi ad Andermatt.

MAD

## Nova retscha da concerts ad Andermatt

■ **(anr/hh) Da Daniev vegn fatg ad Andermatt la partenza dalla retscha da concerts «Andermatt MusicCircle». El decuors digl onn han plirs concerts cun musica dil stil classic entochen jazz liug el hotel The Chedi.** Andermatt para da s'anzar plaun a plaun era ad in liug cun concerts da formaziuns d'alta qualita musicala. Sper il festival da Pastgas che ha liug igl onn vegnent per la tiazra ga dalla dumengia da Palmas, ils 9 d'avrel entochen gliendisdis Pastgas, ils 17 d'avrel inziiescha l'Uniu Swiss Chamber MusicCircle ina nova retscha da concerts. Sco quei ch'ils organisaturs scrivon en ina comunicaziun als mieds da massa vegn quella arranschada sin giavisch dad Oracom e dils responsabels pil hotel The Chedi. Sut il tetel «Andermatt MusicCircle» ein plirs concerts singuls previ durent igl entir onn vegnent. D'udir ein a quels musica classica, da jazz ni era autras direcziuns musicalas mundialis. Ils concerts vegnan dai d'interprets e formaziuns internaziunalas bein enconuscentas.

### Partenza da Daniev

L'entschatta dalla retscha da concerts vegn fatga cun musica classica. Il concert per Daniev, igl 1. da schaner 2017 allas

16.00 porscha la formaziun «Chamber Soloists Lucerne». Dalla partida ei era il solo-violinist *Daniel Dodds* ch'ei gia bein enconuscent al publicum d'Andermatt sco menader artistic e schef d'orchester dil Festival Strings Lucerne. D'udir ei quei di el hotel The Chedi il quintet a corda Es-Dur op. 97 dad Antonin Dvorak, ovras dad Astor Piazzolla, Johann Strauss sco era entginas surpras musicalas d'auters cumponists. Persunas dalla Surselva che vulan nezegiar la caschun d'assistere al concert han la pussivladad da nezegiar la Viafier Matteredhorn Gotard. Essend ch'il concert entschiva gia allas 16.00 eis ei pusseivel da returnar cul tren anavos entochen a Mustér che parta ad Andermatt allas 17.28 ni 18.28.

### Concert cun Enrico Orlandi

Venderdis, ils 17 da fevrer 2017 ha il secund concert dalla retscha cugl enconuscent entertainer *Enrico Orlandi* liug allas 19.30. Cun sia formaziun presenta el tocs da swing eligi specialmeins persuenter, denter auter da Frank Sinatra, Sammy Davis ni era Nat King Cole.

Ulteriuras informaziuns:  
[www.andermatt-musiccircle.ch](http://www.andermatt-musiccircle.ch)



L'Uniu da cant Vuorz durent il concert culla flautista Cornelia Zeitberger.

FOTO A. BEELI